

## «Արմավիրի մարզպետ Համբարձում Մաթևոսյանի խոսքը Շանգալի եզրինների ցեղասպանության զոհերի հիշատակին»

03.08.2020 թ.

2014 թվականին այս օրը եզրինների օրացույցում սև շրջանակի մեջ վերցվեց. եզրիաբնակ Շանգալ բնակավայրում իսլամիստ ահաբեկիչների կողմից տասնյակ հազարավոր եզրիններ սպանվեցին, սեռական բռնությունների ենթարկվեցին մեծաթիվ կանայք ու աղջիկներ: Շատերն էլ, չցանկանալով հավատափոխ լինել, ինքնասպան եղան՝ իրենց ցած նետելով ժայռերից:

Եզրինների ցեղասպանությունը ցնցեց նաև Հայաստան աշխարհը, հայ ժողովրդին. ամենուր ձևավորվեցին «օգնիր եզրիններին» համահայաստանյան խմբեր: Ցեղասպանություն ապրած հայ ժողովուրդը միջազգային տարբեր ատյաններում դատապարտեց եզրինների ցեղասպանությունը և մարդկությանը կոչ արեց սատար կանգնել եզրի ժողովրդին:

Իսկ այսօր, մեր եղբայրական եզրի ժողովրդի հետ մի բուռն դարձած, մենք ոգեկոչում ենք Իրաքի հյուսիսում եզրինների դեմ իրականացված ցեղասպանության զոհերի հիշատակը և կրկին դատապարտում մարդկության դեմ իրականացված և շարունակվող ոճրագործությունները:

Ինչ խոսք, այսօր նաև փաստում ենք, որ, տասնյակ հազարավոր զոհեր ունենալով հանդերձ, եզրի ժողովրդին ցեղասպանել չի հաջողվել և չի հաջողվելու, որովհետև դարերի խորքից եկող այս ազգը պատրաստ է անգամ ինքնազոհողության գնով պահպանել իր հավատը և ազգային արժեքները:

Եվ ուրեմն, փառք եզրի ժողովրդին, հավերժ խոնարհում հանուն ազգային արժեքների իրենց կյանքը զոհած մեր նահատակների հիշատակին: Թող աստված լույսի մեջ պահի նրանց հոգիները և իր օրհնությունը բերի եզրի ժողովրդին: